



# Sama Ngaling Sama Minching



## Aram Mending enggau Bejaku

Pagi hari minggu nya, Lawai enggau aki iya nyual engkayu ba pasar tamu.

Beli Jang. Beli Endun. Agi baru upa lalis tu.  
Rega pan enda mar mina RM3.00 aja sikat.

Uchu, nulung aku ngikat upa lalis tu.  
Jimat enggaika ditebak duri.

Terima kasih, Jang.

Au, aki.

Amat manah tu, aya. Ngagihka  
aku dua ikat dia, aya.

Tu bayar iya, aya.



## A K T I V I T I

1. Keluluka randau di atas ngena lingguk tubuh, kelis mua sereta intonasyen ti betul.
2. Kelala lalu bacha ayat perintah ti bisi dalam jaku randau di atas.
3. Ba runding nuan, nama penguntung ulih kitai enti nyema kitai empu begigaka engkayu ari ti meli di pasar?



Tulis tiga iti ayat perintah nitihka tetiap kategori baka ke di baruh tu.

- a. Ayat asuh
- b. Ayat tagang
- c. Ayat peminta






## Aram Macha

Bacha teks di baruh tu.

### Projek Kebun Sayur

Kelab Sains SK Batu Burak bisi ngatur pengawa ngerupan ngaga projek kebun sayur. Aktiviti tu diatur kena hari enam. Sebedau berengkah ngerupan kepala pengajar meri penerang senentang tuju enggau atur pengawa ngagai semua nemiak, apai indai enggau pengajar. Pengajar Jura dibantu pengajar ke bukai berengkah magi sida ngagai tiga raban nitihka batang pengawa. Apai indai nemiak endang udah nyendiaka kereban kediri empu dikena gawa.

“Seninjik amai hari tu nyangkung kitai. Sebedau tu nyau belunggur ujan,” ku Aki Lawai.



“Amat ku nuan. Aram kitai berengkah kedung ke hari tu manah. Naka ulih mih nembuka pengawa tu lagi,” ku apai Jenaing.

Aki Lawai enggau raban iya nebas babas. Lawai enggau bakih iya ngangkut bangkai rumput ngagai palan ti udah ditagaka. Raban ke bukai berengkah nyangkut tanah ngaga bakut.

“Kitai anang tak semina baka kepayang ngadaka dilah aja. Enda patut pengawa enda ulih tembu,” ku Chairman Gerempung Apai Indai enggau Pengajar.

Sebedau berengkah nyambung pengawa, sida ngetu ngirup kena muai pengelelak bekau ke udah bebendar gawa. Pengajar Jura enggau pengajar



bukai ngenahka ai irup ngagai sida. Pengawa ke penudi iya nya, pengawa betanamka sayur deka dikereja bala nemiak enggau pengajar ba maya ke bukai. Bansa sayur ke deka ditanam sida iya nya baka retak menuang, peria, terung kanggan enggau rampu. Enti udah mansutka asil, kaban kelab deka bulih mayuh penguntung ari ke bejualka sayur. Anak belanja ti disimpan mimit-mimit tau nyadi mayuh lalu ulih dikena ngatur aktiviti ke bukai. Pengudah semua pengawa ambis dikereja, kepala pengajar lalu bejaku dikena nutup pengawa sida sehari nya. Iya meri besai terima kasih ngagai semua laban ti udah ngelimpangka diri enggau enda belampung ati nyaup sekula nembuka projek nya. Semua sida pulai ke rumah enggau lantang ati laban pengawa mujur dikereja.

## AKTIVITI

1. Betanya saut senentang pekara dalam teks dikena ngulihka penerang.
2. Pejuraika dalam raban senentang penguntung betanamka sayur.
3. Ba penemu nuan, nama pengawa bukai ti meri penguntung dikena ngisi maya lepa?

## LATIH

1. Tuliska nama kebuah kaban Kelab Sains ngatur pengawa ngerupan?
2. Nama projek ti bisi diatur Kelab Sains di sekula nuan? Tulis nama penguntung ari projek nya.





## Aram Nulis

Kaban Kelab Sains SK Batu Burak bisi ngatur pengawa ngerupan kena Hari Enam tu tadi. Lawai bisi nulis diari senentang atur pengawa sida maya nya.

**Hari Enam, 9 April 2016**

**7.30 pagi**

Begelumu ba balai sekula mendingka jaku penerang pasal atur pengawa ngerupan ari kepala pengajar. Pengajar Jura dibantu dua iku pengajar magi pengawa nitihka raban.

**8.00 pagi**

Pengawa ngerupan berengkah diatur. Nebas babas. Meresi endur ngaga bakut. Nyangkul tanah.

**10.00 pagi**

Ngetu belelak.

**11.00 pagi**

Pengawa ngerupan disambung baru. Ngemas kereban.

**12.30 tengah hari**

Merarau.

**1.30 ngalih hari**

Begelumu ba balai sekula. Mendingka jaku penutup dikena nutup pengawa ngerupan ari kepala pengajar. Betabi jari sambil meri terima kasih.

**2.30 ngalih hari**

Pulai ke rumah.



1. Kelala lalu tulis ayat penerang ti bisi dalam teks diari di atas.
2. Terangka nama penguntung ari pengawa ngerupan. Bantaika penerang nuan dalam kar gelembung.



Giga isi enggau sukung isi ti bekaul enggau topik "Ngerupan Meresi Kandang Sekula". Uдах nya, tulis diari belalauka isi enggau sukung isi nya tadi.





## Aram Nulis

Kelab Sains udah mujur ngatur aktiviti ngerupan ngaga projek kebun sayur. Helma, sekretari kelab dipinta nyendiaka ripot pasal aktiviti ngerupan nya.

### Lansa Ripot Aktiviti Ngerupan Ngaga Projek Kebun Sayur

Kelab Sains SK Batu Burak udah mujur ngatur aktiviti ngerupan ngaga projek kebun sayur kena 9 April 2016. Pengawa tu digulu apai indai, pengajar enggau nemiak sekula.

Pukul 7.30 pagi, kami begelumu ba balai mendingka penerang pasal pengawa ngerupan ari kepala pengajar. Sepengudah kepala pengajar bejaku, kami dibagi ngagai raban nitihka batang pengawa. Apai indai nyendiaka kereban baka duku enggau changkul dikena meresi endur ngaga projek kebun sayur. Sekeda raban nebas babas endur ngaga bakut. Raban kami ngangkut bangkai rumput. Tanah dichangkul endur ngaga bakut. Tembu pengawa, kami besaup ngemas kereban ti udah dikena ngerupan.

Pukul 12.30 tengah hari, kami ngetu belelak lalu merarau. Sebedau pulai ke rumah, kepala pengajar meri besai terima kasih ngagai semua orang ti bisi datai enggau ngerupan sehari nya. Pengawa nya mujur laban kami lempung tulang nulung pangan diri. Pengawa ti berat tau nyadi lempung enti sema kitai sama betulung ngereja pengawa.

Disediaka ulih,

12 APRIL 2016

.....  
(HELMA A/P MUTHUSAMY)  
Sekretari Kelab Sains,  
SK Batu Burak.



1. Perati lalu kerandauka format ripot di atas.
2. Ba penemu nuan, nama penyadi enti nyema kitai enda betulung ngereja pengawa?



1. Tulis ayat topik enggau ayat penerang ke bisi ditemu nuan ba ripot di atas.
2. Gaga siti ripot pasal pengawa ke bisi diatur di sekula kita. Ripot nya patut ngundan mayuh bansa ayat sereta tanda bacha ti betul.





## Jalai Jaku

Maya peremisi ujung minggu Timai nulung indai iya ngaga kerupuk jabang. Peratika chara seduai ngaga kerupuk jabang belalauka gambar di baruh tu.



1. Keterubah iya, Timai nulung indai iya marut buah jabang ngena pamarut.



2. Uдах nya, seduai ngaraka jabang ti uдах diparut ba daun pisang.



3. Jabang ti uдах diara ba daun pisang lalu dikukus datai ke chukup mansau.



4. Jabang ti uдах dikukus lalu dijembu datai ke penumbas iya pengerangkai.



5. Nangkan nya, seduai lalu ngelitika daun pisang ari jabang.



6. Jabang diguntin nitihka tukung dipilih diri empu. Uдах nya, dijembu baru.







Timai seduai indai iya nyual kerupuk jabang. Rega sebungkus RM3.50 aja.

Sumber: *Senorita Anak Gu*

Graf 1: Agih Belanja




Penyampau untung beresi indai Timai bulan tu RMI,000.00.

## AKTIVITI

1. Kelala jaku pengawa transitif bepelasarka gambar tadi.
2. Ba runding nuan, baka ni chara ngemansangka pengawa ngaga kerupuk awakka nyadi pengawa dagang?
3. Kira penyampau belanja ungroup tetiap pekara dalam graf di atas.

## LATIH

1. Tulis ayat ngena jaku pengawa transitif ti disediaka di baruh tu.



2. Tulis not senentang nyimpan duit ngena tulis tampung dalam bup latih.





## Bungai Jaku

Bacha cherita di baruh tu.

### Anak Tupai Belajar ari Penyilap

Indai Tupai enggau anak iya diau ba kampung gun. Indai Tupai selalu irauka pengelikon anak iya laban Ular enggau Burung Lang deka makai anak iya.



Dinga manah ke ajar aku, anak. Nuan, anang sekali-kali pansut ari lubang kayu tu maya aku nadai. Ditu mayuh jelu siga begigaka pemakai.

Au, indai. Aku bedanji enda pansut ari lubang tu.



Hari siti Indai Tupai pansut ari lubang laban deka ngiga pemakai ngagai endur bukai. Anak iya tinggal kediri ba sarang.



Aku deka nurun ngiga pemakai. Ingatka ajar aku.

Au, indai.



Anak Tupai enda ingatka ajar indai iya agi. Iya pansut ari lubang kayu laban deka bemain enggau Anak Rasung. Ketegal ti kelalu rindang bemain, seduai enda nemu penatai Burung Lang. Burung Lang lapar amat. Enda chamang-chamang Burung Lang entachang deka nyambar Anak Tupai. Seninjik bendar Indai Tupai datai lalu sempat narit anak iya tama ke dalam lubang.

Akai ... rai, indai! Aku enda nyangka diri empu ulih idup tadi. Enti nyema nuan laun datai, nyangka lesi bebadi mih aku enda tepadahka nyawa.



Kur semengat. Nasit aku jampat datai tadi narit nuan, anak. Ke agi tu ila anang enda ngasika ajar aku.



Aku minta ampun indai laban ti enda ngasika ajar nuan. Pekara ti udah nyadi tu ngasuh aku sedarka penyilap diri.

Seduai menyanak mindah ngiga endur ke likun agi.





# AKTIVITI



1. Sebut watak ke bisi dalam cerita nya.
2. Terangkan gaya penidau watak dalam cerita nya tadi.
3. Giga lalu sebut ajar manah ke bisi ditemu dalam cerita nya tadi.
4. Ba runding nuan, nama penyadi enti kitai enda ngasika ajar apai indai?

# LATIH

1. Tulis gaya penidau watak nitihka dalam cerita nya tadi.

Watak	Gaya Penidau
Indai Tupai	
Anak Tupai	
Burung Lang	

2. Giga bida antara watak Burung Lang enggau Indai Tupai.



3. Tulis ajar manah ke bisi dalam teks cerita "Anak Tupai Belajar ari Penyilap".
4. Giga antonim leka jaku di baruh tu.

Leka Jaku	Antonim
pansut	
narit	
penatai	
jampat	
likun	





## Pengukuh

### Seridi

1. Isi lapang ngena jaku pengawa transitif ti betul dalam ayat di baruh tu.

tebas

basu

muai

simpan

nanam

- rumput ba kebun sayur awakka enda repa.
  - jari dataika beresi sepengudah maja sayur.
  - Bala nemiak dibai pengajar ensabi ba kebun sayur.
  - semua kereban ba endur ti likun sepengudah ambis ngerupan.
  - Ngalai babas ba kebun sayur ba belakang rumah ngena duku penebas.
- Tulis baru ayat di baruh tu ngena tanda bacha ti betul.
    - simpan changkul ba endur ke likun.
    - kelab sains sk batu burak ngaga projek kebun sayur
    - anang enda bejimat megai upa lalis enggaika ditebak duri
    - kitai patut betulung maya ngereja pengawa ngerupan
    - pengajar jura ngasuh helma ngaga ripot projek kebun sayur
  - Giga leka jaku ari pitak urup di baruh ti bisi bekaul enggau utai tumbuh enggau jelu siga.


KULAT	N	C	B	I	M	I	W	A	U	T	K	BULUH
	Q	H	U	H	U	T	A	N	L	U	E	
	P	L	L	K	P	I	T	A	A	Y	M	
	J	P	U	Y	A	K	E	H	R	H	I	
NYUMBUH	A	H	H	I	C	U	T	S	K	O	D	TUBU
	B	S	E	M	I	R	U	L	U	K	I	
	A	L	I	K	T	U	B	G	L	H	N	
KEMIDING	N	O	R	I	H	A	U	S	A	T	G	JABANG
	G	N	Y	U	M	B	U	H	T	L	S	
	R	K	E	N	Y	A	L	A	N	G	B	
KENYALANG												ULAR
												UPA




## Pengaya

1. Gaga bup skrap ti bekaul enggau jelu siga enggau utai tumbuh.

### Chunto Bup Skrap



2. Tuliska empat guna bup skrap dalam kar gelembung.



3. Tulis ayat ngena jaku pengawa transitif di baruh tu.

ngirup	ngikat
nyimpan	nyambar
narit	nyangkul
ngangkut	ngagih
ngatur	nyambung

4. Tembuka karang di baruh tu.

Lemai nya, Kelab Rampa Menua sekula kita bisi ngatur pengawa meresi kandang sekula. Enda mukai-mukai, bakih nuan tak nyerarat ... .



 **Tisih**

- A. Giga urat jaku ari jaku pengawa di baruh tu. Lalu gaga ayat ngena urat jaku nya.

No.	Jaku Pengawa	Urat Jaku
1.	digulu	
2.	begigaka	
3.	ngenahka	
4.	dibungkus	
5.	betanamka	

- B. Tulis dua ayat perintah nitihka tetiap kategori di baruh tu.

1. Ayat asuh
2. Ayat tagang
3. Ayat pengelalu
4. Ayat peminta

- C. Tabakka tanda bacha ti betul dalam genteran teks di baruh tu.

sayur sebengkah ari bansa pemakai ti amat beguna ke pengerai tubuh nitihka piramid pemakai kitai diasuh makai mayuh sayur laban iya bisi ngundan vitamin enggau garam mineral ti beguna ke tubuh kitai sekeda asai sayur nya pait manis enggau masam asai peria pait nya alai sekeda orang enggai makai peria taja peria bisi ngundan protein lemak mineral serat karbohidrat vitamin enggau kalsium ti beguna sereta manah ke pengerai

- D. Tulis siti genteran senentang pengawa orang dalam gambar di baruh tu.





Unit  
8

# Sedada Sama Seati

## Aram Mending enggau Bejaku

Lemai siti Pelanduk, Kera enggau Tekura betemu lalu berandau. Keluluka randau sida tiga tu.



- Kera : Nama runding kitai sebuat lem ai tu?
- Tekura : Aku tu sepem ai aja bakih.
- Pelanduk : Pelaba aku, manah kitai merambu pengawa ti ulih ngerapitka kaul enggau pangan diri.
- Tekura : Nama kini pengawa ti tau diatur kitai? Pengerami enggau lomba ba ai tau kini?
- Kera : Pengerami endang tau bakih, tang belumba ba ai nya enggai tentu nyadi laban ukai semua kitai tu nemu nyemerai. Ba penemu aku manah kitai ngerupan meresi kampung.
- Pelanduk : Aku setuju. Lama endar kampung kitai tu enda diperesi. Kelimpah ari nya, kitai mega ulih begulai enggau pangan diri.
- Tekura : Au, nya ti manah. Enti kitai sedada sama seati pengawa kitai nyadi.



## AKTIVITI

1. Kelala bagi ayat ti nyukung tauka mantah siti-siti pekara dalam randau nya.
2. Beri chunto pengawa ti nunjukka pengidup begempung ba genturung pendiau.
3. Ba runding nuan, nama penguntung begempung enggau pangan diri?

## LATIH

### BERAT SAMA NGANGKAT LEMPUNG SAMA NANGGUNG

1. Kenataika penemu nuan dikena nyukung rambai jaku di atas lalu bantaika ngena kereban ICT.
2. Tulis karang bepelasarka gambar di baruh tu dikena mantaika rambai jaku di atas.





## Aram Macha

Bacha teks di baruh tu.

Hari Pengajar diintu kena 16 Mei ninting taun. Iya diintu dikena meri basa, puji enggau pengaga ati ngagai semua bala pengajar ke udah bebendar ngajar sereta meri penemu enggau pemandai ngagai bala nemiak sekula. Maya pengerami tu mayuh program enggau aktiviti diatur dikena ngerami iya. Semua bala pengajar, nemiak enggau bala pengereja pengawa ke bukai sama-sama ngambi bagi berami bebala mayuh ba aktiviti ti bisi diatur.

Sekeda ari aktiviti maya nya nyengkaum mendingka bacha Jaku Pesan Hari Pengajar ari Menteri Pelajar Malaysia enggau ari Tuai Pengarah Opis Pelajar Malaysia. Sida mega mendingka jaku ari kepala pengajar, macha Sempekat Hari Pengajar ti lalu ditangkanka bala pengajar ke nyadaka lagu Hari Pengajar. Sida bisi mega aktiviti sangking baka melah kek Hari Pengajar enggau pengerami main ti bukai.

Maya tu mega mayuh bala nemiak meri tepa ngagai bala pengajar. Tu dikena ngenataika puji sereta pengaga ati ke pementas, penyabar enggau budi pengajar ke udah ngembing, ngiring sereta ngajar sida ngulihka pemandai enggau penemu. Sekeda apai indai nemiak mega bisi meri tepa ketegal ti temegah ke budi pengajar ke udah ngambuh anak sida nyadi nemiak ke mereti sereta mujur dalam pelajar.

Hari Pengajar mai reti ti besai ngagai bala pengajar. Sida ulih ngasaika pengawa ke ngajar bisi dikenati sereta diberi puji. Endang senutuk endar bala pengajar suah disemaka baka dian ke nunu diri ketegal meri penampak ngagai orang bukai.



# AKTIVITI

1. Nama kebuah Hari Pengajar tu diintu?
2. Sebut aktiviti maya ngintu Hari Pengajar ba sekula kita.
3. Ba runding nuan, nama simpul penemu senentang teks tu?

# LATIH

1. Giga antonim enggau sinonim leka jaku di baruh tu lalu bantaika ba kar titi.

Sinonim	andal	lebu	gaga	penampak
Tipak	....	....	....	....
Antonim	mujur	suah	puji	gaga
Tipak	....	....	....	....

- 2.

**PEKIT NGARANG PELANDAI  
HARI PENGAJAR  
SK BATU BURAK**

Lumur		RM250.00
Lumur		RM200.00
Lumur		RM150.00

**Anang muai peluang, anjung Pelandai Hari Pengajar  
kita ngagai Pengajar Digat sebedau 8 Mei 2016.**

- a. Ba runding nuan, nama pemanah ngatur pekit ngarang pelandai Hari Pengajar?
- b. Nuan siku ari nemiak ti deka masuk pekit ngarang pelandai Hari Pengajar. Tulis karang pelandai nuan.
- c. Enti sema nuan menang dalam pekit tu, baka ni nuan ngatur guna duit nya?






## Aram Nulis

Tulis baru teks di baruh tu ngena tanda  
bacha ti betul.

radin benung niti jalai pendai sepengudah iya  
mandi iya tekenyit ninga bala chapuh radin  
meda apai iya belanda di baruh rumah apai  
radin nyerauh api api api tulung tulung tulung  
lebu iya malik ke punggung setak ulu iya meda  
asap nyau chelum sida serumah begau  
    enda chamang-chamang apai jenaing lalu  
nutup suis karan jompat sah sida radin sebilik ku  
apai jenaing bala bukai lalu begigaka sida radin  
sebilik ini radin benung gali di pangking iya enda  
nemu api benung nyadi di dapur indai radin nyerat  
nyabak minta sah sida ke lelaki berumban lalu ngambi  
ini enggau adi radin udah nya bala bukai berampas  
berangkut keresa sida radin sebilik sekeda ari sida  
besaup madamka api ti baru deka nyadi nasib bendar  
api bedau nyerarai ngagai kasau rumah  
    sida radin serumah benasib bendar laban api nya  
ulih dipadamka enti sida enda besaup madamka api  
nya tentu sida ditinggang penusah



## A K T I V I T I

1. Baka ni kitai ulih mantu orang ti ditinggang penusah angus rumah?
2. Ba runding nuan, nama pekara ti patut digaga kena nyeliahka penusah angus rumah?



Gaga karang senentang chara kitai tau nyeliahka penusah angus rumah.





## Jalai Jaku

Bacha ensera di baruh tu.

### Begempung Maya Penusah

Sekali lebuah panas bisa, Badak enggau Pelanduk sama aus. Seduai berebut deka ngirup laban engkebuk nya mit sereta nyau deka langkang. Benung Pelanduk meremika tubuh deka ngirup ai, Badak lalu nyeging iya.

“Aku dulu ngirup, laban aku besai sereta tuai ari nuan,” ku Badak.

“Ni tau baka nya. Ukai nuan tetemuka engkebuk tu, aku,” pia ku Pelanduk. “Sapa dulu tetemuka iya, nya mih dulu ngirup. Enti aku udah badu lagi nya baru nuan,” ku Pelanduk.

“Aku dulu, laban aku besai. Enti bisi laluh, baru nuan ngirup,” terengak Badak.

“Enti nuan dulu ngirup abis ai nya. Ukai nuan berundingka orang. Nuan ensepi gamal diri besai, enggai enda beungkup ngipakka gamal,” timbal Pelanduk.

Ninga Pelanduk munji nya, Badak lalu ngetikka Pelanduk ke tisi. Ensepi diri digaga baka nya, Pelanduk lalu bejaku.


“Enggai nyadi kita ke besai sereta tuai peneka ati enggau kami ke mit sereta biak. Enggai nyadi adat kitai jelu dirumpang ngapa,” ku Pelanduk.

“Aku ukai ngerumpang adat jelu, laban aku aus, nya alai aku minta ngirup dulu,” ku Badak.

“Nya kita Badak nyadika sema jaku, enti orang nyemaka orang ngakal, selalu kumbai orang pedua Badak laban kita selalu ngelakar kami,” ku Pelanduk.

Ninga Pelanduk nyakah iya, Badak lalu merakka nyawa muru Pelanduk. Benung seduai begagai, seduai tepedaka burung Lang. Nyadi Lang nya endang beridup ba bangkai jelu. Lebuah tepedaka Lang, Pelanduk seduai Badak sama besirat iku.

“Nadai reti tua belaya enggau pangan,” ku Badak. “Enti tua ngeras diri ngelaban pangan, Lang gaga enti tua belaya laban tua tulihka penusah ke tau



ngasuh mati. Uдах tua mati bangkai tua diempa iya.”

“Amat nya!” timbal Pelanduk.

“Nuan dulu ngirup, tang ngalauka aku,” ku Badak.

“Tubuh aku ampuh enti direndam ba engkebuk tu, dini aku teabiska ai tu,” ku Pelanduk.

“Nyadi ke agi tu ila, anang kitai ngering diri ngelaban pangan laban laya kitai ngenusahka diri lalu nguntungka orang bukai. Leбуh maya kitai bisi penusah, kitai enda tau enda begempung mutarka penusah nya. Kitai anang nyanda laya leбуh maya tusah,” ku Pelanduk.





(Dibali ari: Edward Kechendai, 1970, *Sekeda Cherita Pandak*, BLB.)

## A K T I V I T I

1. Bacha ensera ngena intonasyen nitihka tanda bacha.
2. Ba penemu nuan, nama penyadi enti Pelanduk seduai Badak majak berebut deka ngirup ai ba engkebuk?
3. Pejuraika pemanah pengidup kitai ti belalauka adat.

## L A T I H

1. Kelala bagi leka jaku ti ngundan penambah belakang –ka dalam teks.
2. Tusun leka jaku nya dalam pitak di baruh tu.

Jaku Pengawa Transitif	Jaku Pengawa Intransitif
	

3. Gaga ayat ngena leka jaku penambah belakang –ka ti udah dikelala dalam teks.
4. Rintaika ukur pemanah ti bisi dalam teks.






## Bungai Jaku

Bacha teks di baruh tu.

### Kebun Lia Kungsi

Komiti Pemansang enggau Pengelikon Rumah Panjai Kumbong bisi ngaga kebun lia kungsi. Projek tu diatur enggau bantu ari Opis Betanam Betupi Pelilih Menua Subis. Semua 30 pintu sida serumah sampal enggau masuk projek tu. Sida apai Timai serumah gagit ngereja projek tu ngena chara ngerupan baka ti suah dikereja sida ngelama tu.

Ba atur pengawa ti keterubah sida sebuat besaup nyendiaka tanah alai bekebun ti endajauh ari rumah panjai sida.



Sida besaup nebas lalu meresi tanah alai ngaga bakt. Sida nyangkul bakt endur nerenakka lia. Pengawa sida berupai lempung laban sida serumah sama saum ati sereta segulai sejalai berari indah enda munyi ku jaku tuai, lempung sama nanggung, berat sama



ngangkat. Sida enda betiki pinang, enda betiki nibung.

Udah tembu nyendiaka bakt, sida apai Timai lalu sama besaup nanam lia. Sida serumah begintir-gintir ngintu kebun lia kungsi. Sida dibagi ngagai enam raban

ti ngundan lima pintu seraban. Sekeda pengawa ti dikereja sida nya maja enggau mantun bakut lia enggaika alah gasak rumput. Kelimpah ari nya, sida sebuat mega begintir-gintir nyiram lia ti suah dikereja beturut hari lalu semina belepa enti hari ujan.

Kebun lia kungsi sida apai Timai serumah mujur amat. Asil kebun sida didaja tauka dijual ukai semina ngagai sida serumah tang mega ngagai rumah bukai ke sama begenturung enggau sida. Kelimpah ari nya, mayuh mega asil kebun sida dijual besemekih enggau asil kebun orang bukai ba

pasar tamu. Duit asil ari rega lia dikukun lalu disimpan enggau naka penyeremat sereta likun nitihka atur kira-kira ti endang udah ditetapka komiti sida.

Pemujur kebun lia kungsi sida apai Timai serumah ukai semina ulih mai penguntung ari segi duit ringgit tang mega ulih ngerapitka kaul antara diri serumah kelimpah ari enggau opis tauka agensi perintah. Berindik ari pemujur tu, projek sida serumah udah ditemu lalu diaku perintah nyadi siti projek chunto ngagai rumah panjai bukai.



## AKTIVITI

1. Bacha lalu rintai ka rurun pengawa ti nyadi dalam cherita tu.
2. Padahka ajar manah ti bisi dalam cherita tu.
3. Peragamka nama penyadi kebun lia kungsi sida apai Timai serumah enti sida bisi betiki pinang, betiki nibung.

## LATIH

1. Gaga rurun pengawa ti bisi dalam teks ngena kar rurun.
2. Ba runding nuan, nama penguntung enti kitai idup beserakup sereta segulai sejalai enggau pangan diri?
3. Karang siti cherita bekaul pengawa ngerupan.





# Pengukuh

## Seridi

Tembuka leka jaku beteresna di baruh tu ngena leka jaku antonim enggau sinonim.



5. b

1. b e [ ] [ ] [ ] 4. b

i

2. b [ ] g [ ] [ ] p [ ] r u

6. k

3. b e [ ] [ ] l [ ] [ ] g a

r

### Melintang

Giga sinonim leka jaku tu.

1. bebagi →
2. begelumu →
3. besaup →

### Ngunjur

Giga antonim leka jaku tu.

4. begulai →
5. bebai →
6. begenturung →



## Pengaya

Gaga karang bepelasarka rintai gambar di baruh tu lalu beri topik ti engkeman.



pindah rumah—berangkut—lori



tiga iku—ngangkut perengka rumah



berimbau pendiau—besaup—jampat tembu



meri terima kasih—gaga ati





## Tisih

A. Pilih ayat ti ngundan tanda bacha ti betul.

1. a. Pengajar, terima kasih laban udah ngajar aku, ku Lawai.  
b. “Pengajar, terima kasih laban udah ngajar aku,” ku Lawai.  
c. “Pengajar terima kasih laban udah ngajar aku,” ku Lawai  
d. “pengajar, terima kasih laban udah ngajar aku,” ku lawai.
2. a. “Akai, pedis amat kaki aku kena indik nuan!” ku Pelanduk.  
b. “Akai pedis amat kaki aku kena indik nuan” ku Pelanduk.  
c. Akai, pedis amat kaki aku kena indik nuan! ku Pelanduk  
d. “akai, pedis amat kaki aku kena indik nuan!” ku pelanduk.

B. Pejantilka jaku penambah belakang –ka ba urat jaku di baruh tu lalu gaga ayat ngena leka jaku ti udah dipejantilka nya.

1. ngasai

2. begiga

3. nyema

4. nitih

5. madam

6. nguntung

C. Giga reti rambai jaku di baruh tu lalu bantaika ngena kar titi.

1. Besirat iku.

2. Baka dian ti nunu diri ke penampak orang bukai.

3. Berat sama ngangkat lempung sama tanggung.







## Asil Pengelandik Jari



### Mending enggau Bejaku

Peratika gambar lalu keluluka dialog di baruh tu.

Timai : Nama gaga nuan, ini? Ulih aku nulung nuan?

Ini : Benung madat tikai. Ulih aah. Tu sikap ulih nuan lagi, uchu. Sidan nya engkah ba atas mija.

Timai : Au, tu ti dikumbai sidan, pia?

Ini : Iya mih nya. Sidan tu ke sula mata buah ukir. Iya alai beteladan ngaga asil pengelandik jari ke besai baka tikai tu.

Timai : Ooh, pia! Manah buah tikai nya. Tikai nama tu dih, ini?


Ini : Tu tikai bemban dianyam bebuah bangkit.

Timai : Rindu endar aku meda abi jari nuan, ini.

Ini : Nya alai, enti ulih aku meransang nuan belajar kala aku agi dapat.

Timai : Au, ini. Maya peremisi tu tua ila belabuh belajar.

Ini : Manah mih nya, uchu. Ngarapka kita ke rebak dudi agi nampung pengawa tu.



# A K T I V I T I


1. Kelala bagi jaku pesan enggau respons ti bisi dalam dialog nya tadi.
2. Kelala lalu tulis bansa ayat ti bisi dalam dialog nya.
3. Nama penyadi asil pengelandik jari enti kitai selalu bepanggai ba pekakas moden? Bantaika ngena kar segala rata.

# L A T I H

1. Tulis jaku pesan aki ngagai bala uchu iya bepelasarka gambar di baruh tu.



2. Isi kar di baruh tu.





## Aram Macha

Artikel tu dibacha Helma ba librari. Bacha artikel tu.

Ari kelia mensia endang begunaka utai tumbuh. Utai tumbuh ukai semina ke pun pemakai tang ulih nyadi ke perengka dikena begagaka rumah. Kelimpah ari nya, iya mega dikena ngaga kereban anyam tauka kereban bukai. Sekeda utai tumbuh ti tau dikena ngaga kereban anyam iya nya rutan, bemban, kerupuk, senggang, akas, purun, daun biru enggau mayuh agi ti bukai.



Chunto sekeda kereban ti digaga ari utai tumbuh iya nya baduk, seluk, sintung, selabit, tanggui, pemansai, lanji enggau chapam. Kereban tu endang beguna dalam pengidup kitai besehari-sehari lalu dikena nitihka bansa pengawa ti dikereja. Ambi ke banding, lanji enggau selabit dikena berangkut, baduk enggau baka dikena besimpan lalu pemansai enggau bubu dikena berikan.

Kereban tu dikena ari kelia sebedau kereban moden ditengkebang. Iya ukai semina nyadi aris ti berega tang kemaya hari tu tau ke pun penatai pemisi. Nya alai, tanka mih aris kitai tu enggai ke nyau ditabanka hari. Kemeranka mih pengelandik jari tu baka wi tampung tali, rutan tampung danan.



Sumber: Lily Nyelia Anak Daud


### Glosari

baduk	– kereban dikena besimpan
seluk	– kereban anyam dikena nyimpan benih maya menih
sintung	– kereban ditangkin maya ngetau
selabit	– kereban dikena ngema barang kasar
pemansai	– kereban dikena berikan
lanji	– ma dikena mai padi, betiang empat
tanggui	– dikena ngelindung diri ari panas enggau ujan



# AKTIVITI

1. Giga kereban anyam asal bukai kelimpah ari ti bisi dalam teks nya.



2. Kerandauka dalam raban guna sesebengkah kereban di atas nya.
3. Peragamka baka ni kereban pengelandik asil jari ulih mantu nyungkek pemansang industri dagang temuai.

# LATIH

1. Giga chunto kereban ti digaga ari rutan nitihka guna ngena kar kayu.



2. Kelala bagi kereban tu nitihka penerang dalam glosari.

selabit	pemansai	tanggui

Sumber: Lily Nyelia Anak Daud

3. Ba penemu nuan, nama pekara ti tau nasalka pengawa ngaga kereban pengelandik jari.




## Aram Nulis

Bacha leka main di baruh tu.

A.

Betukuh segala, dikena ngetau  
Danyam pisit ari bila rutan  
Bisi raming nadai kerakau  
Tali penyandik beribiska temeran.



Rampa menua mesti dijaga  
Nyadika pesaka serata dunya  
Kereban nya endang beguna  
Sintung saut tanya nuan nya.



Aku tu sebansa ari kereban  
Digaga ari senggang tauka bemban  
Dikena betampi tauka ngeruman  
Uji giga saut nya bala kaban.

B.



Mayuh beraban ga burung puna  
Mupuk terebai maya agi serepan  
Kereban nya dikena nampi ampa  
Pelaba aku saut iya chapan.



Sumber: Lily Nyelia Anak Daud



# AKTIVITI

1. Sadaka leka main nya ngena chara bepasang.
2. Ba penemu nuan, nama kebuah kereban nya tau dikumbai kitai siti ari aris ti berega?
3. Ba penemu nuan, nama chara ngenanka aris nya ari lus?
4. Tunda tulis leka main dalam lambar 81 ngena kereban ti patut nitihka kreativiti diri empu. Pandangka asil nya ba sukut Jaku Iban.

## LATIH

Tulis karang senentang bansa utai tumbuh bepelasarka grafik di baruh tu ngena mayuh bansa media. Beri chunto kereban ti digaga ari utai tumbuh nya.



bemban



rutan

Utai tumbuh ti dikena ngaga kereban



kerupuk



senggang


Sumber: Lily Nyelia Anak Daud



## Jalai Jaku

Jenaing nusui peneleba diri begigaka rutan enggau aki iya ba kampung ngagai sida sekelas. Bacha cherita Jenaing nya.

Rutan tu sebansa utai tumbuh ti panjai sereta beduri tajam. Iya tumbuh tinggi lalu bekait ba pun kayu ti bukai. Nyadi aku tu deka nusui peneleba diri ngiga rutan maya peremisi suba. Aku enggau aki ngiga rutan ba kampung. Serantu jalai, aku meda rampa menua ti manah amat. Ari atas tuchung bukit aku nimpai kampung ke nyau rapas mata. Burung richah bemunyi ngasuh runding berasai lantang.



Datai di kampung, aki belabuh ngiga rutan. Rutan nya panjai sereta beduri. Iya bejimat maya narit rutan laban duri rutan nya tajam. Iya tumbuh tinggi lalu bekait ba pun kayu ti bukai. Nya alai, lebuah aki narit rutan munyi iya inggar amat. Aku nguji makai buah rutan, asai iya kelat laban agi mata. Chukup maya ngetu, kami duai aki lalu muka tungkus bekal. Maya nya perut endang udah asai ti dikeramak bayak.



Nyau tangan ngalih hari, kami duai mulaika diri. Ba rantu jalai, aki ngumpul daun kesindu. Daun tu bebau bisa agi ari buah petai. Maya pulai kami duai mansa mayuh bansa buah ke benung bebungai. Apu, baru aku nemu bungai pakan bebau rengut! Nyau silau hari kami duai datai ba rumah. Akai rai, taja pan aku lelak amat tang gaga laban ke bulih peneleba baru.




# AKTIVITI

1. Kelala lalu rintaika jaku adjektif ti bisi dalam teks nya ngena kar kayu.
2. Cheritaka peneleba diri bekaul enggau pengawa maya peremisi.
3. Peragamka baka ni gaya rampa menua ti nyamai alai ngidupka diri.

# LATIH

1. Tulis asil pengelandik jari ti digaga ari rutan dalam kar kayu di baruh tu.



2. Rintaika dua iti jaku adjektif ba tetiap rawang di baruh tu.

rawang peda ... ...	rawang tegu ... ...	rawang sepi ... ...	rawang bau ... ...	rawang dinga ... ...
------------------------------	------------------------------	------------------------------	-----------------------------	-------------------------------

3. Gaga ayat ngena jaku adjektif di atas.
4. Pilih siti asil pengelandik jari ti ditemu nuan. Tuliska segenteran penerang ngena jaku adjektif ti engkeman dikena nerangka asil pengelandik jari nya.
5. Bemalinka cherita Jenaing, tulis siti surat elektronik nuju bakih nuan ti nusui peneleba nuan maya peremisi tu tadi.






## Bungai Jaku


Bacha cerita di baruh tu.

Kepuas-puas bejalai neresa kampung Riti berasai lelak lalu ngetu. Iya pan nyandih ba pun kayu ti besai. Ai mata iya ngenjing perebujuh labuh ngenang penyeranta diri. Enda lama udah nya iya bisi ninga nyawa orang nyapa.



Riti berasai tekenyit sereta alit ati ninga pun buluh enggau tebelian ngelala lalu nyapa iya. Riti enda tesagamka reti jaku utai tumbuh ti madahka diri ulih nulung iya. Iya mengkang duduk sambil mata iya beratika rampa menua dia.

Riti meda mayuh amat bansa utai tumbuh ti bisi ngelingi iya. Ba tebing sungai mayuh pun bemban enggau kerupuk tumbuh galak. Ba munggu mayuh pun senggang, lung enggau biru. Muak ke kaki bukit mayuh batang tebelian ti bebesai. Riti beba runding tang enda lama udah nya mua iya berupai terang. Iya tuchum gaga.





Hari beganti hari, Riti ngasaika pengidup iya belinsur nyamai ari ke suba laban semua kereban ti dikena ngidupka diri dikemisi iya. Riti laban ke endang pandai di chunggai ujung jari ulih ngasilka kereban ti alus sereta manah. Kenyau ari nya, iya angkunka utai tumbuh ngambika bisi diariska ngagai anak telesak dudi hari ila.

## AKTIVITI

1. Terangka endur pekara ti nyadi dalam cherita nya.
2. Kelala bagi watak ti bisi dalam cherita tu lalu bantaika ngena kar gelembung.
3. Ba runding nuan, nama guna utai tumbuh ngagai mensia kelimpah ari dikena ngaga kereban asal kitai?
4. Ba penemu nuan, nama kebuah utai tumbuh tau dikumbai pesaka ti berega?

## LATIH

1. Giga reti rambai jaku pandai di chunggai ujung jari.
2. Tuliska ukur pemanah ti bisi dalam cherita nya.
3. Ba runding nuan, peragamka pengujung pendiau pengidup Riti.



## Pengukuh

### Seridi

Kelala lalu giga bansa kereban dalam pitak bepelasarka gambar tu.



Sumber: Lily Nyelia Anak Daud



### Pengaya

Bacha leka main di baruh tu lalu saut tanya ti nangkanka nya.

Dinga kita semua dih wai  
Enda milih biak tauka tuai  
Ti diau di negeri besai  
Tauka ba rumah panjai  
Aku bepesan deka meransang  
Sama nyaga aris ti tebilang  
Enggaika mina nyadi buah kenang  
Jaga mih iya enggaika lelang  
Ni kita bala apai indai  
Bediri kitai sama berintai  
Ngenanka aris bansa kitai  
Awakka ngerembai ngerekai  
Ni kita bala bakih, bala menyadi  
Dikeandalka kami pengabis ati  
Pelajarka mih pengelandik jari  
Ulih dikena ngidupka diri dudi hari.

- Kelala jaku adjektif ti bisi dalam leka main nya.
  - 
  - 
  - 
  -
- Gaga ayat turu ngena jaku adjektif di atas.
- Tulis jaku pesan bepelasarka leka main nya.
  - 
  - 
  -
- Ba penemu nuan, nama kebuah penulis madahka aris tu semina nyadi buah kenang enti iya enda dijaga?



## Tisih

1. Peratika gambar di baruh lalu gaga latih ti nangkanka nya.
  - a. Tulis jaku pesan ngena chara ti manah.
  - b. Gaga segenteran karang ngena mayuh bansa ayat.



2. Kelala gambar di baruh tu lalu tipak enggau penerang iya. Tulis nyadi ke glosari dalam bup latih.

Kulit kayu  
ke ribis ma.



Utai tumbuh  
dikena ngaga  
tanggui.

Tau nyadika tali  
dikena ngebat  
sereta ngikat ubung  
ti deka ditenun.

Bila ulih dianyam  
nyadi tikai  
perampan.



3. Gaga ayat ngena jaku adjektif dikena nerangka gambar di baruh tu.



Sumber: Lily Nyelia Anak Daud





# Mimit Diserepit, Mayuh Ditaruh



## Aram Mending enggau Bejaku

Peratika lalu kerandauka gambar di baruh tu senentang Timai ke disempulang indai iya muka akaun ba bank. Ba penemu nuan baka ni asai ati Timai lebuah udah bisi akaun bank?




# A K T I V I T I

1. Keluluka randau Timai seduai indai iya enggau orang ti gawa ba bank.
2. Kerandauka tiga iti penguntung nyimpan duit ba akaun bank ngena kar segala rata.
3. Ba runding nuan, patut tauka enda tetiap iku nemiak bisi akaun bank kenyau ari mit? Nama kebuah?

# L A T I H

1. Gaga kar sukung dikena nerangka chara ngatur belanja ti diberi apai nuan tiap-tiap hari.
2. Tulis ayat bepelasarka tetiap gambar di baruh tu. Uдах nya bantaika ba mua kelas.





## Aram Macha

### Kedai Gerempung Madu Midang

Rumah panjai Madu Midang ti betuaika Tuai Rumah Engkaul, mujur numbuhka kedai gerempung ti benama Kedai Gerempung Madu Midang. Tuai Rumah Engkaul **dichiri** nyadi chairman. **Sapit** chairman nya Matu lalu Igat Rimong nyadi **tukang** wang. Sida tiga tu teleba ngatur pengawa di rumah panjai sida. Rumah sida ti panjai lima puluh pintu nya endang begempung ati bejalaika gerempung nya. Rumah sida di Madu Midang udah dipilih nyadi Rumah Panjai Chunto Taun 2014 suba.

Pemayuh untung kedai gerempung sida bisi betambah ari taun ke taun. Ba taun 2011, untung sida semina RM10,000.00 aja. Untung ba taun 2012 pan sama enggau ba taun 2011 tang ba taun 2013 penyampau untung bisi niki ngagai RM30,000.00. Untung sida majak niki ngagai RM60,500.00 dalam taun 2014 lalu ke taun 2015 niki ngagai RM120,000.00.

Asil tauka untung kedai tu bisi dikena mantu sida serumah. Kelimpah ari nya, sida mega meri perais ngagai nemiak ti bulih pemutus peresa ke manah sereta mantu ruang bilik ti kena tinggang penusah.

Asil ari kedai gerempung tu mega bisi dikena nemuai sambil belajar ngagai gerempung dagang ti udah maju sereta dikena ngulu program baka kus tauka seminar dagang. Nambahka nya, sida bisi ngungkupka duit dikena ngintu hari gawai awakka enda ibuh **mupu** ari tetiap pintu bilik.

Ketegal kedai gerempung sida udah maju sereta beberita, sida mayuh udah nerima perais. Ambi ke banding, dalam taun 2014, sida bisi nerima *Anugerah Koperasi Desa Contoh 2014*. Tuai Rumah Engkaul udah nerima perais nyadi *Korporator Terbaik* laban iya rajin sereta **chakah** ngempung sida



serumah bejalaika pengawa gerempung. Igat Rimong mega bisi nerima perais mata duit RM30,000.00 laban kedai gerempung sida bulih gelar *Pengurusan Akaun Koperasi Desa Terbaik 2015*.



## A K T I V I T I

1. Bacha teks di atas ngena intonasyen ti betul.
2. Giga reti leka jaku ti bechelak mirah dalam teks ngena diksihari.
3. Rintaika rurun pemansang Kedai Gerempung Madu Midang ngena kar rurun.
4. Enti nuan deka bulih surat puji tauka perais ba sesebengkah pengawa, nama utai ti patut dikereja nuan?

## L A T I H

1. Gaga ayat ngena leka jaku ti bechelak mirah.
2. Tengkebang tiga iti ayat ngena leka jaku penyambung tunggal ti bisi dalam teks.
3. Enti nuan nerima bantu ari gerempung tu, baka ni nuan mandangka tanda terima kasih ngagai sida?





## Aram Nulis

Bacha teks lalu peratika gambar di baruh tu.

Meling menyadi Radin baru udah abis nembuka pengawa belatih nyadi polis ba palan pematih polis. Iya belabuh gawa ba Balai Polis Pusat, Kuala Lumpur. Kos idup tinggi bendar, nya alai iya enda ulih enda bekelimat ngena belanja.

Taja pan kos idup di Kuala Lumpur tinggi, tang Meling bisi chara napi pekara nya. Tambah mega iya endang udah teleba bekelimat ari sekula suba. Iya semina nitihka atur belanja diri empu. Ninting bulan iya nyimpan sekeda ari gaji iya dalam akaun bank. Suah agi iya bebelanja ba pasar ti bejualka barang rega murah tang bekualiti. Iya mega rajin betanamka sayur ngena chara hidroponik. Asil iya ulih mantu ngurangka belanja dapur. Kelimpah ari nya, Meling jarang amat makai ba kedai. Iya rumpas amat berapi lalu nyendiaka bekal ti dibai iya kereja.

Lebuh nurun kereja, Meling bekunsi kerita enggau bakih iya. Chara tu ulih ngurangka belanja. Meling enggau bakih iya nadai penanggul bekunsi kerita laban kaul antara sida sigi manah indah enda baka isi enggau kukut.

Betaun-taun sepengudah bekelimat ngena belanja, ulih ga iya meli sebuah kerita Proton bansa ti baru. Enda lama agi iya bisi tawing enggau begulai. Iya nadai penanggul laban lama udah besediaka payung sebedau ujan.



Meling – belatih – senapan



Sayur – chara hidroponik – bekelimat



Ujung bulan – bank – apai indai



Simpan – kerita – bebini




## AKTIVITI

1. Kerandauka situasyen ti dipandangka dalam empat iti gambar nya.
2. Kunsika peneleba chara nuan bebelanja enggau kita sekelas.
3. Ba runding nuan, nama kebuah kitai patut bekelimat ngena belanja?
4. Terangka enggau silik reti “besediaka payung sebedau ujan”.

## LATIH

1. Tulis ayat ngena leka jaku ba tetiap gambar dikena nerangka situasyen ti dipandangka.
2. Bepelasarka teks, pindahka penerang nya ngagai grafik di baruh tu.



3. Tulis karang bepelasarka penerang dalam grafik di atas.



## Jalai Jaku

Bacha ayat di baruh tu.

1.



Tuai Rumah Engkaul bagas.

2.



Kedai kami Kedai Gerempung Madu Midang.

3.



Madu Midang ba pelilih menua Sungai Payan.

4.



Meling menyadi Radin belatih nyadi polis.

## AKTIVITI

- Kelala subjek enggau predikat ayat nya nitihka;
  - FN + FN
  - FN + FP
  - FN + FA
  - FN + FJPt
- Gaga ayat tunggal nitihka leman ayat di atas.
- Ba runding nuan, nama pekara ti nyungkak ati Meling deka nyadi polis?

FN – Frasa Nama  
 FP – Frasa Pengawa  
 FA – Frasa Adjektif  
 FJPt – Frasa Jaku Penempat





1. Tulis dua iti ayat tunggal dikena nerangka subjek enggau predikat nitihka atur di baruh tu.

a. FN + FN

b. FN + FP

c. FN + FA

d. FN + FJPt

2. Gaga ayat turu ari ayat tunggal di baruh tu ngenajaku penyambung ti engkeman.

a. Lawai enda tembu kereja latih.  
Lawai dianu pengajar.

b. Radin rindu bemain sepak takraw.  
Radin enda rindu bemain hoki.

c. Ini aku mentas.  
Ini aku manah ati.

d. Indai Suraya benung berapi.  
Indai Suraya belagu.

e. Jenaing enda nurun sekula.  
Jenaing sakit pedis perut.

f. Apai Radin enda nurun nangkal.  
Hari ujan.

g. Timai nurun sekula.  
Jenaing nurun sekula.

h. Aki Radin nurun ke umai.  
Aki Radin ngabas bubu.



## Bungai Jaku

Bacha dindang di baruh tu ngena intonasyen ti betul.

### Mimit diserepit, mayuh ditaruh

*Timai ke kedai meli gula  
Laluh duit simpan dalam tabung  
Kitai mesti bekelimat bebelanja  
Dudi hari pulai ke penguntung*

*Sida Madu Midang betuaike Engkaul  
Barang gerempung sida mayuh macham  
Rajin betanam betupi enggau besayur  
Mayuh untung ulih meli saham*

*Tuai Rumah Engkaul chukup chakah  
Matu enggau Rimong sapit iya  
Untung gerempung selalu betambah  
Mantu anak sida pandai besekula*

*Gelar Rumah Panjai Chunto diterima  
Selalu berakup enggau pangan diri  
Enti kaya anang sangat empelita  
Awakka penguntung betali ai.*





*Diatu rega barang majak niki  
Getah enggau sawit turun rega  
Bebelanja anang peneka diri  
Manah ba Kedai 1Malaysia*

*Meling polis ngembuan ati teguh  
Landik bekelimat diau di negeri  
Mimit diserepit mayuh ditaruh  
Melanja anak belajar ba universiti.*

## AKTIVITI

1. Kelala ayat tunggal enggau ayat turu dalam leka dinding di atas.
2. Kerandauka ajar manah dalam leka dinding di atas.
3. Kerandauka reti rambai jaku 'mimit diserepit, mayuh ditaruh' bepelasarka situasyn dalam pengidup kitai besehari-sehari.

## LATIH

Tengkebang leka dinding ngena ayat tunggal enggau ayat turu senentang siti ari topik di baruh tu.

- a. Chara bejimat ngena belanja
- b. Penguntung bejimat ngena belanja





## Pengukuh

### Seridi

#### A. Ayat Tunggal

Peratika chara nempa ayat tunggal di baruh tu. Peratika subjek enggau predikat lebuah ngaga ayat tunggal.

No.	Subjek	Predikat
1.	Tuai Rumah Engkaul	bagas.
2.	Sida di Madu Midang	betuaika Tuai Rumah Engkaul.
3.	Sida	udah numbuhka kedai gerempung.
4.	Tuai Rumah Engkaul	dichiri sida nyadi Chairman.
5.	Sida serumah	bisi lima puluh pintu.

#### B. Ayat Turu

Peratika chara nempa ayat turu di baruh tu.

Sapit Chairman iya nya Matu. Tukang wang sida igat Rimong.

Sapit Chairman iya nya Matu **lalu** tukang wang sida igat Rimong.

No.	Subjek	Jaku Penyambung	Predikat
1.	Sapit chairman iya nya Matu	lalu	tukang wang sida igat Rimong.
2.	Sida ngatur penemuai sambil belajar	sereta	sida betatika gerempung dagang ti udah maju.
3.	Penyampau untung dagang sida taun 2012 RM10,000.00.	tang	ba taun 2013 penyampau untung sida bisi niki ngagai RM30,000.00.

### Latih

1. Tulis lima iti ayat tunggal enggau lima iti ayat turu.
2. Tengkebang siti jaku berambai ti ngajar orang bekelimat ngena belanja.



## Pengaya

1. Bacha lalu peratika penerang dalam pitak di baruh tu.  
Chara Timai ngerikod duit belanja iya ba pun taun 2016.

DUIT SIMPAN		
Haribulan	Pemerri Ari	Penyampau (RM)
4 Januari 2016	Indai	15.00
20 Januari 2016	Aki	5.00
Penyampau		RM20.00

DUIT BELANJA		
Haribulan	Pekara	Penyampau (RM)
4 Januari 2016	Meli bup tulis	2.00
	Meli penyuran	1.00
	Meli ruti	0.50
10 Januari 2016	Meli sabun mandi	2.00
15 Januari 2016	Meli bup latih Sains	3.00
20 Januari 2016	Meli pinsil 2B	1.50
	Meli selipar	4.00
Penyampau		RM ...

Duit simpan – Duit belanja = Luluh duit

2. Isi endur lapang pasal chara Timai ngena duit belanja ba pun taun 2016 di baruh tu, belalauka penerang dalam pitak di atas.

Kena 4 Januari 2016, Timai bisi nerima duit ti diberi ..... iya RM ..... .  
Sehari nya mega iya bisi meli dua iti bup tulis ti berega RM ..... . Iya mega meli sebatang ..... ti berega RM1.00. Kelimpah ari nya iya mega bisi meli sebungkus ..... ti berega 50 sen.

Kena 10 Januari 2016, iya bisi meli setuku sabun mandi ti berega RM ..... .  
Kena 15 Januari 2016, iya meli bup latih Sains ti berega RM ..... .





Kena 20 Januari 2016, aki Timai bisi ngabas iya ke sekula. Aki iya bisi meri iya duit RM ..... . Sehari nya mega iya bisi meli sebatang pinsil 2B ba kantin sekula ti berega RM ..... . Ba ujung bulan nya mega, iya bisi meli sepasang selipar ti berega ..... laban selipar iya ti lama udah putus tali.

- Kira penyampau duit belanja Timai sepemanjai bulan Januari.
  - Berapa laluh duit belanja Timai ba ujung bulan Januari?
  - Tuliska pengenap tesa ti bisi dikena dalam teks latih di atas.
  - Ba penemu nuan, landik ke enda Timai ngena belanja. Nama kebuah?
3. Peratika penerang ba pitak di baruh tu pasal pengawa pemansang sida Tuai Rumah Engkaul di Madu Midang.

Pengawa Pemansang	Skim Buah	Skim Getah	Skim Lada	Pegung Ikan	Sawit
Penyampau Pintu (50)	5	15	10	8	12

- Bepelasarka pitak di atas, gaga siti **graf bar** pasal pengawa pemansang sida di Madu Midang.

Chunto:



- Ba penemu nuan, ba taun 2016 enggau ti nangkanka nya, baka ni ku gaya pengidup sida di Madu Midang?





## Tisih

- A. Gaga leka jaku ti bisi besangkut paut enggau pengawa dagang ti dilalaika dalam Jaku Berasuk di baruh tu.



- B. Pilih saut ti betul ngagai tanya di baruh tu belalauka leka dindang ba lambar 97 enggau 98.
- Dini endur Timai nyimpan laluh duit?  
a. baruh tilam    b. dalam beg    c. ba pengajar    d. dalam tabung
  - Sapa nyadi Chairman Kedai Gerempung Madu Midang?  
a. Tuai Rumah Engkaul    b. Meling    c. Matu    d. Lawai
  - Nama tanda puji ti udah diterima sida Tuai Rumah Engkaul serumah?  
a. Rumah Pemadu Beresi    b. Rumah Panjai Chunto  
c. Rumah Panjai Begempung    c. Rumah Panjai Tebilang
  - Pengidup Meling di negeri senang laban iya landik ...  
a. belagu    b. bedagang    c. bekelimat    d. bekebun
  - Kedai tu selalu nyual barang murah agi ari kedai bukai.  
a. supermarket    b. kedai runchit  
c. kedai pajak gadai    d. Kedai 1Malaysia





# Angin Oh Angin



## Aram Mending enggau Bejaku

Perati lalu kerandauka gambar di baruh tu.



Nunu uras



Nunu babas

Sumber: *Senorita Anak Gu*

## AKTIVITI

1. Betanya saut senentang gambar di atas.
2. Nama penyadi enti sema orang majak betunuka uras tauka babas?
3. Pejuraika chara nyeliahka pengawa nunu baka ti di atas.

## LATIH

Rintaika chara kitai ulih nagang pengawa nunu ngena chara tebuka.





## Aram Mending enggau Bejaku

Timai enggau bakih iya berandauka pasal angin ti udu besebun ba menua sida. Keluluka randau sida tu ngena intonasyen ti betul.



Apu, hari tu nyau majak besebun! Angin baka tu sigi enda manah ke pengerai.

Maya belajar Sains, Pengajar Jura udah madahka kitai senentang pemanah ngena sengkabung mua. Sengkabung mua ulih nyeliahka debu alus tama ke dalam tubuh kitai.

Amat. Nya alai anang enda nyaga pengerai. Enti ulih anang empelita enggau pengerai diri.

Endang amat ku seduai. Kitai patut ngena sengkabung mua maya bisi aktiviti di luar.

## AKTIVITI

1. Ba penemu nuan, nama kebuah angin besebun?
2. Baka ni chara kitai nyaga pengerai maya angin besebun?
3. Ba runding nuan, nama kebuah kitai patut ngena sengkabung mua maya ngaga aktiviti di luar?

## LATIH

1. Rintaika lima kebuah ti ngasuh angin majak besebun dalam kar gelembung.
2. Tuliska kebuah kitai enda diperansang ngaga aktiviti luar maya angin besebun.



## Aram Macha

Bacha enggau silik karang di baruh tu.

### Angin Majak Kamah

Angin kamah nya ngundan **gas, molekul** tauka **zarah** ti enda manah. Angin kamah mai pengerusak ke kitai mensia, utai idup enggau rampa menua. Angin nya kamah ketegal bisi ngundan **gas sulfur monoksid, nitrogen dioksid, gas karbon monoksid** enggau debu ti enda manah ke pengerai.

Penanggung angin kamah tu endang bepun ari asap tebal ke mayuh pansut ari kilang, perengka pengangkut enggau pengawa nunu ngena chara terbuka. Nambahka nya, pengawa nunu ke enda beradat majak nyadi. Betunuka reban ba kebun ke bedandang besai sepeneka ati mega tau ngerusak sesebengkah menua. Suah mega bisi nyadi kampung angus ketegal pengawa orang ti enda bejimat enggau api baka betikauka papung ruku ti agi bisi api. Semua utai tu nyadi ketegal ulah mensia.

Angin ti kamah mai penusah ukai semina ngagai mensia tang mega jelu, utai tumbuh enggau rampa menua. Angin besebun ngasuh menua kitai dilamun asap tebal. Asap tebal ngasuh rampa peda serekat ti ngujungka penusah bebadi ba jalai raya selalu nyadi.

Sebun tauka asap tau ngenataika pengerusak ngagai pengerai tubuh kitai mensia enggau utai idup ti bukai. Kitai suah ngasaika diri tusah enseput ketegal mayuh nyintak asap. Baka nya mega asap tu tau ngasuh mata kitai bepedi sereta belai. Asap tebal ti ngundan debu alus ngujungka penyakit baka batuk, riman, sengk enggau anemia.

Penanggung ke baka tu tau mega ngasuh ekonomi menua nyau kusut kelebihan agi baka industri dagang temuai. Temuai ari menua luar enggai datai ke menua tu ketegal nangika pengelikon diri.

Nya alai, semua kitai patut nyeliahka diri ari ngereja pengawa ti ngamahka angin. Angin ti beresi manah ke pengerai tubuh mensia enggau utai idup ke bukai.









# AKTIVITI


1. Kerandauka reti leka jaku ti bechura mirah dalam teks. Giga reti leka jaku nya dalam dksionari.
2. Ba penemu nuan, baka ni kitai ulih nyaup perintah neritka undang-undang nyaga pemanah rampa menua?
3. Nama penyadi enti nyema perintah enda ngaga undang-undang nyaga pemanah rampa menua?

# LATIH

1. Giga sereta tulis reti terminologi di baruh tu.

Glosari	Reti
gas	 ...
molekul	 ...
sulfur	 ...
monoksid	 ...
karbon	 ...
nitrogen	 ...

2. Bepelasarka terminologi di atas gaga ayat ngena jaku diri empu.
3. Liska kebuah angin besebun lalu padahka nama penyadi enti nyema angin majak besebun dalam kar berurun-rurun.




4. Gaga karang pandak pasal “Angin Kamah Ngerusak Pengerai”.



## Aram Macha

Bacha teks di baruh tu.



Penumbuh mayuh kilang beserimbai enggau **pemansang** menua udah mansutka asap ti lebih lalu ngujungka angin kamah sereta bebau. Kelimpah ari nya mega, asap ari kilang balat ngeluarka debu ti ngujungka orang ke diau berimbai dia kena tuntung penusah rumah bedebu.

Gari ti dijembi di luar mega bebau sereta bedebu. Nambahka nya, pengagit ati sekeda mensia ke amu ngujungka sida

muka mayuh kebun bedandang besai. Nya alai, pengawa betunuka **reban** ngeluarka asap ke mayuh ti bechampur enggau **kelatan**. Asap ke baka tu mega ngenataika penusah ngagai mensia, jelu enggau utai idup. Kemaya hari tu, penyampau perengka pengangkut jauh udah betambah.

Asap ke dikeluarka ari perengka pengangkut ngeluarka gas karbon monoksid. Gas tu ngundan **rachun** ti tau ngerusak pengerai.



Asap ti disintak lebu kitai enseput tau ngasuh **lempuang** kitai sakit laban asap nya ngundan gas ti berachun ti tau ngasuh **sel** dalam lempuang kitai rusak. Dunya kitai kemaya hari tu udah jauh berubah ketegal lapis **ozon** nyau udah **mipau** bendar. Ari nya kitai udah ngasaika **pengangat** dunya tu nyau majak betambah.

## A K T I V I T I

1. Giga reti leka jaku ti bechura mirah dalam kereban sanding.
2. Ba penemu nuan, baka ni chara ulih ngurangka angin besebun?

## L A T I H

1. Tulis ayat ngena jaku ti bechura mirah dalam teks di atas.
2. Tulis karang ti bekaul enggau topik, "Penanggung Ketegal Pengamah Angin".





## Aram Nulis

Sadaka lagu ti dikirim pangan nuan nengah WhatsApp.

### Oh Angin

Angin menua tu majak besebun  
Enda ngira di pesisir tauka nengeri  
Sama dituntung penusah besebun  
Ngasuh kitai irau berari

Baka nya mega utai tumbuh  
Majak ditebang ngasuh tusah ati  
Bala jelu sama ngasai penusah  
Sebanaka diri suntuk pemakai

Oh dinga kita semua  
Patut panjang runding enggau kira  
Nunu babas anang sengapa  
Laban nya tau ngamahka dunya

Ari nya kitai anang enda ngira  
Anang ngerusak rampa menua  
Laban nya pesaka amat berguna  
Beguna ke pengidup dudi ila.

Tiun Lagu: *Dunya Inflasi*, Michael Jemat





# AKTIVITI

1. Kerandauka ayat tunggal enggau ayat turu ke bisi ba lagu nya tadi.
2. Gaga dua genteran lagu ti besangkut paut enggau rampa menua ngena chara beraban. Uдах nya, kirumka ngagai pangan nuan ngena WhatsApp.
3. Ba runding nuan, baka ni angin besebun ulih ngachau aktiviti kitai besehari-sehari baka ke di baruh tu?
  - a. Industri dagang temuai
  - b. Pengawa betanam betupi
  - c. Aktiviti kokurikulum di sekula

# LATIH

1. Tulis ayat turu belalauka ayat tunggal di baruh tu.

Ayat Tunggal	Ayat Turu
Angin besebun. Kitai patut ngena sengkabung mua.	 _____
Angin beresi patut dijaga. Angin beresi manah ke pengerai.	 _____
Gumpul uras ba kandang sekula. Buai ba tung uras.	 _____
Kami ngerupan meresi palan memarin. Palan memarin beresi.	 _____
Asap ngundan gas berachun. Asap tau nganu pengerai.	 _____

2. Tulis ukur pemanah ke bisi dalam lagu tadi.






## Jalai Jaku


Peratika gambar lalu bacha ayat di baruh tu.

### Ayat Aktif Transitif enggau Pasif



Kasih mih tudah kami, tu. Kami selalu ditebang enggau ditunu. Kampung dikeruga sepeneka ati. Nadai endur jelu besarang.

Nadai penyadi enti majak baka tu. Tusah amat ngiga pemakai enggau endur belindung. Pun kayu ambis ditebang.



Asap ti dipansutka ari kilang, perengka pengangkut enggau betunuka babas ngasuh kami kamah sereta bebau. Semua utai idup tasal ketegal kami ti udu kamah. Kami tu amat berguna ngagai mensia, jelu enggau utai tumbuh.

Penerebai kami tejanggal laban angin udu besebun. Sebun ti melap tebal tau ngenataika penanggul maya kami angkat enggau sangkai ba padang bilun.



Sinu ninga sebana deriba kami ke enda ulih meda enggau terang laban ti kabur. Suah kami belantak enggau pangan diri laban seraka peda ti udu serekat.

Enti baka tu nama mih penyadi anak mensia idup di duniya dudi ila? Penyakit mayuh nuntung ngerusak pengerai kelebihan agi sida ti sakit sengak pedis ka enseput. Anang enda ngena sengkabung mua maya di luar rumah. Nya alai kitai mesti begempung ngintu sereta nyaga rampa menua ngambika meruan menyana nyadika pesaka rebak dudi.



# AKTIVITI

1. Kelala ayat aktif transitif enggau ayat pasif dalam teks.
2. Giga jaku pengawa transitif dalam teks.
3. Gaga ayat aktif enggau ayat pasif ngena jaku diri empu.
4. Nama kebuah sida sebanaka pendiau pengidup diri?
5. Uji pelabaka nama penyadi menua tu enti nyema Indeks Pengamah Angin ngelui ari tikas ti ngirauka ati?

# LATIH


1. Tulis lima ayat aktif transitif enggau lima ayat pasif.
2. Kelala lalu garis bagi jaku pengawa transitif dalam ayat di baruh tu.
  - a. Orang enda ulih nurun berikan laban hari besebun.
  - b. Angin ti balat besebun ngujungka bebadi ba jalai raya suah nyadi.
  - c. Mensia pedis deka enseput laban angin ti disintak kelalu kamah.
  - d. Kitai patut nyaga pengerai diri maya angin besebun.
  - e. Pengawa orang ti nebang kayu sepeneka ati tau ngasuh tikas pengangat menua betambah.
3. Tukar ayat aktif transitif ngagai ayat pasif.

Chunto: **Ayat aktif transitif**

Ah Meng nanam pun kayu.

**Ayat pasif**

Pun kayu ditanam Ah Meng.

Ayat Aktif Transitif	Ayat Pasif
Kitai patut nyaga pemeresi angin.	
Perengka pengangkut ngeluarka gas berachun.	
Ibu Rinjong ngiga daun engkayu ba kampung.	
Tuai rumah nagang sida serumah nunu babas.	
Lawai numbakka butul enggau put kusung dalam tanah.	
Pengajar Jura ngajar nemiak chara ngena sengkabung mua enggau betul.	





## Bungai Jaku

Jenaing udah menang dalam Pekit Licha Entara Sekula Pelilih Menua sida. Bacha teks ti dikenataika Jenaing ngena intonasyen, kelis mua enggau lingguk tubuh ti engkeman.



### Chara Nyaga Pemerisi Angin

Meri tabi basa lalu selamat pagi ngagai Tuan Pengatur Program, raban hakim, pengajar sereta ngagai kitai semua ti bisi begempuru ditu.

Aku berasai gaga bendar diberi peluang bejaku ngagai bala mayuh pasal tanggung pengawa kitai nyaga pemerisi angin. Ngena peluang tu aku mantaika sekeda penemu aku ti deka dipekunsika enggau kitai semua.

Penanggul angin kamah tu endang bepun ari pengawa orang ti balat betunuka reban ba endur ke bedandang besai. Kampung angus ketegal orang ti betikauka papung ruku ti agi bisi api. Asap tebal tu enda manah ke pengerai kelebihan agi sida ti sakit sengak enggau batuk.

Bala peninga mayuh,

Mayuh chara dikena kitai nyaga pemerisi angin. Di sekula, disediaka kurikulum senentang Pelajar Rampa Menua ke bala nemiak. Pengajar patut terus ngajar nemiak pasal tanggung pengawa nyaga pemerisi angin ke tiap-tiap iku kitai. Kelimpah ari nya, kimpin sereta penerang ulih nulung ngelalau mensia mayuh ngambika enda ngereja pengawa ti ngamahka angin. Brosur ti nerangka chara nyaga pemanah rampa menua mega tau disadung ngagai semua orang.

Bala peninga mayuh,

Perintah mega patut neritka undang-undang rampa menua awakka ekosistem setimbang. Sapa ti ditemu ngereja penyalah deka diukum. Kompaun maksimum RM1,000.00 ngagai orang ti muai uras sepeneka ati sepengudah Akta Sisa Pepejal dan Pembersihan Awam (PPSPPA) 2011 berengkah dikena. Teritka ukum ngagai orang ti nginsap ba premis orang mayuh. Ukum ti setipak patut diberi ngagai pengempu kilang tauka perengka pengangkut ti mayuh ngeluarka asap.

Kepenudi,


Tetiap iku kitai patut nemu tanggung pengawa diri nyaga pemerisi angin lalu ukai semina bepanggai ba perintah aja. Angin beresi idup bepengerai.

Nya aja, terima kasih.





## AKTIVITI

1. Kerandauka enggau pangan nuan pasal isi licha.
2. Dalam raban nuan, kerandauka format nulis licha.
3. Ba penemu nuan, nama kebuah Jenaing menang dalam pekit licha?
4. Pindahka informasyen senentang chara nyaga pemeresi angin dalam kar gelembung.



## LATIH

1. Tulis lima iti isi ti beguna ari teks licha.
2. Giga isi senentang topik “Chara Nyaga Pemeresi Rampa Menua”. Uдах nya, tulis isi dalam kar kayu.
3. Tulis karang licha senentang topik nya tadi belalauka isi dalam kar kayu.
4. Tulis lima ayat senentang gambar di baruh tu.





## Pengukuh

### Seridi


Pilih lalu isi lapang dalam lumpung karang ngena jaku pengawa di baruh tu.



Penyampau orang ke ... penyakit sengk sereta penyakit ke bukai ti berindik ari pengamah angin bisi nambah. Nya alai, mensia mayuh ... kelebihan agi sida ke bisi penanggul lempuang ngambika nyaga pengerai baka bekenaka sengkabung idung enggau mulut lebu ... aktiviti di luar rumah. Sekeda utai ti diundan angin ti ... kitai lebu kitai enseput nya ngundan gas ti berachun ti tau ngasuh sel dalam lempuang kitai rusak. Baka nya mega asap tu tau ngasuh mata kitai bepedi lalu tau ngujungka pedis mata. Ketegal nya kitai enda ulih ... pengawa baka orang bukai ke suman nadai pemedis tauka nadai penyakit.

### Pengaya

1. Gaga ayat transitif ngena leka jaku di baruh tu.



2. Gaya ayat pasif ngena leka jaku di baruh tu.





## Tisih

A. Baca teks di baruh tu.

### Pemesai Guna Kampung

Mayuh bendar guna kampung ba pengidup kitai mensia di dunya tu. Tebal agi utai ke dikena kitai idup bisi dalam kampung. Kitai mayuh nemu sekeda utai idup enggau utai tumbuh ti bisi ba kampung nyengkaum kayu, burung, indu utai, jelu, ikan enggau bansa utai idup ke bukai. Sekeda utai tumbuh tu tau diempa lalu bisi nya enda tau diempa.

Ba kampung jerung agi meruan bisi pengidup siga baka rusa, kijang, beruang enggau jelu ke bukai. Ikan dalam sungai sigi mengkang magang laban nadai ditubai tauka dirachun. Pemakai bukai baka upa enggau engkayu ari babas sigi agi meruan.

Bemacham-macham buah ti tau diambi sereta digumpul kitai ari kampung, baka buah rian, tutung, enseruit, puak, temedak, kubal, engkeranji, buah rutan, danan, kembayau enggau buah ke bukai. Kelimpah ari ti ngulihka pemakai mega, kitai begunaka kampung endur ngambi kayu ramu dikena ngaga rumah.

Kitai mega begunaka akar, randau, enggau wi ari kampung. Utai tumbuh bukai baka bansa palma enggau jaung diambi kena ngaga atap. Nibung ke tiang enggau ke gelegar. Wi dikena ngaga macham-macham bansa ma, tikai enggau mayuh perengka anyam. Daun biru dikena ngaga tudung lalu takang iya dianyamka chapan enggau perengka anyam ke mit agi.

Kenu ku bala saintis, kampung tu beguna bendar laban iya tau nukar karbon dioksid ngagai angin ti dikena kitai enggau semua utai benyawa di dunya tu idup.

Kitai sama nemu pemesai guna kampung tu. Diatu pengawa nyaga kampung enggau pemanah rampa menua nya siti ari bidang dalam Dagang Temuai Menua kitai. Nya alai, kitai anang ngerusak kampung nyadika pesaka menua ti chukup berega.



- B. Saut semua tanya di baruh tu belalauka teks.
1. Nama asil ti ulih kitai ari kampung?
  2. Nama kebuah kampung beguna ba pengidup kitai?
  3. Nama kebuah jelu siga agi mayuh ba kampung jerung?
  4. Nama penyadi utai idup baka jelu enti nyema nadai utai tumbuh agi ba kampung?
  5. Enti nyema kayu ambis ditebang ketegal deka ngaga pengawa pemansang, nama penyadi ngagai kitai mensia? Dini kitai bulih kayu?
  6. Nitihka teks, kayu mayuh guna dalam pengidup kitai mensia. Terangka guna kayu dalam kar segala rata.

- C. Beri sinonim ngagai leka jaku di baruh tu.



- D. Tulis leka jaku penganap tesa ti setipak enggau leka jaku ti diberi.

Leka Jaku	Penganap Tesa
wi	...
atap	...
tikai	...
tugal	...
langkau	...

- E. Gaga ayat tanya belalauka ayat penerang di baruh tu.
1. Jelu siga idup meruan laban habitat sida enda dikeruga.
  2. Angin besebun ketegal ulah mensia ti balat betunuka reban.
  3. Kami enda ulih meda utai jauh enggau nyengala ketegal udu besebun.
  4. Rutan tau dianyamka mayuh macham bansa utai baka tikai, selabit enggau bakul.
  5. Maya angin besebun kami ngena sengkabung mulut enggau idung ngaga aktiviti di luar rumah.
  6. Sekeda utai idup enggau utai tumbuh ti bisi ba kampung nyengkaum kayu, akar, rutan, burung, indu utai enggau bansa bulu babas ke bukai.








# Palan Pengumbai Temuai



## Aram Mending enggau Bejaku

Kerandauka palan pengelantang ati ba kar di baruh tu.



# AKTIVITI

1. Betanya saut senentang palan penemuai belalauka kar.
2. Kerandauka pasal palan penemuai di baruh tu.



Sumber: Lydia Anak Ungam

3. Enti nuan bisi peluang ngelawa palan penemuai di Sarawak, ni bagi palan ti dipilih nuan? Padahka kebuah nuan milih palan nya lalu bantaika penemu ngena kar sukung.
4. Ba penemu nuan, nama pekara ke narit penatai temuai ari menua luar ngagai menua Sarawak?

# LATIH

1. Liska palan penemuai ti udah dikerandauka di atas ngena kar kayu, lalu bantaika ba mua kelas.
2. Gaga poskad palan penemuai ti dikerinduka nuan.



## Aram Macha

Bacha teks di baruh tu.

### Palan Bejual Bebeli

Sarawak digela Bumi Kenyalang berindik ari pemaayah burung Kenyalang ti bisi ditemu ba menua tu. Kelimpah ari ngembuan mayuh palan penemuai, Sarawak mega bisi pasar tamu enggau pasar jalai ti suah disebut Pedestrian Mall ti tebilang.



Medan Niaga Satok tu tamu ti tebilang di Kuching. Palan tu chukup tebilang laban ikan masin terubuk sereta kek lapis ke dijual dia. Mayuh macham bansa asil babas mega bisi dijual. Maya ujung minggu tamu tu penuh dedat laban mensia ti bebelika macham bansa sayur, buah enggau barang pemakai ke bukai.

Tamu Sibu iya nya pasar tamu ti pemaadu besai di Sarawak. Tamu Sibu tu chukup tebilang laban bisi nyual buah dabai ti nyamai. Ba tamu Sibu mayuh bansa engkayu baka upa lalis enggau sayur babas bisi dijual ditu. Kelimpah ari nya asil betanam betupi enggau pengelandik jari bisi mega dijual.



Tamu Muhibah mega sebuah tamu ti chukup tebilang di Bandaraya Miri. Tamu tu tebilang alai nyual beras Bario enggau bubuk. Asil ari bubuk baka belacan, enchalau enggau bubuk rangkai mayuh dijual ditu. Ditu mega mayuh nyual buah salak enggau bansa buah ti bukai. Mayuh macham asil pengelandik jari mega bisi dijual ditu.



Pasar India Street tu sebuah pasar jalai ti chukup tebilang di Kuching. Iya tebilang alai bebelika rempah, gambir enggau kain ti bemacham chura enggau motif. Kelimpah ari nya, pasar India Street mega tebilang alai bebelika mayuh bansa pekayan enggau perengka dapur baka periuk belanga enggau chapak mangkuk.



Sumber: Lydia Anak Ungam

Pasar Main Bazaar tu sebuah pasar lama ti betiban enggau Sungai Sarawak. Iya tebilang alai bala temuai bebelika tepa dibai pulai. Sekeda ari kereban ti tebilang dibeli iya nya asil tenun baka pua kumbu, kain kebat, baju burung enggau selampai. Kelimpah ari nya, temuai mega rindu meli tikai idas, tikai rutan, terabai enggau engkeramba. Ditu mega bisi bejual perengka temaga enggau kereban tabuh.

## AKTIVITI

1. Bacha lalu giga isi teks dikena ngaga simpul penemu senentang barang ti dijual ba palan bejual bebeli bepelasarka teks. Bantaika simpul penemu ngena kar titi.

Palan bebeli	...	...	...	...	...
Barang dijual	...	...	...	...	...

2. Nama kebuah dagin jelu siga nadai dijual ba pasar tamu?
3. Ba penemu nuan, nama penguntung menua Sarawak ngembuan palan bejual bebeli tu?

## LATIH

Saut tanya di baruh tu.


1. Nama barang pemakai ti tebilang ba Medan Niaga Satok?
2. Ba penemu nuan, nama kebuah temuai rindu bebelika barang ba India Street?
3. Enti temuai deka meli kereban temaga enggau kereban tabuh, dini palan bejual bebeli ti patut dituju iya?
4. Baka ni chara kitai ulih narit mayuh agi temuai datai ngagai palan bejual bebeli ba menua kitai?



## Aram Nulis

Bacha teks di baruh tu.

### Taman Negara Lambir



Sumber: Lydia Anak Ungam

Taman Negara Lambir tu tisi Jalai Miri-Bintulu. Penyauh iya ari Bandaraya Miri 30 kilometer. Taman Negara Lambir tu ngembuan 1173 bansa kayu enggau 237 bansa burung. Kelimpah ari nya mayuh mega bansa jelu bukai baka tupai, rusa, kera, pelanduk, landak enggau ti bukai. Mayuh bansa indu utai mega bisi ditemu ba Taman Negara Lambir tu.

Taman Negara Lambir tu tebilang ketegal Wung Latak. Penyauh Wung Latak ari opis penerang kira-kira pejalai kaki sepengelama 20 menit. Wung Latak dikerinduka temuai ketegal guchur ai wung nya ke bulih 25 meter peninggi. Sepemanjai bejalai kaki nuju wung nya, kitai ulih meda anak sungai ti chiru. Dia kitai ulih meda kenaya ikan dalam sungai nya. Kelimpah ari nya kitai mega deka mansa mayuh bansa kayu enggau bungai kampung. Ba rantu jalai nya bisi siti jematan gantung. Uдах ke meraka sungai nya kitai deka mansa sigi bukit ke tinggi. Ba tuchung bukit nya bisi kayu sepun ti pemadu besai ba Taman Negara Lambir. Sebedau datai ba Wung



Latak dia kitai deka mansa Wung Pantu enggau Wung Nibung ti ngembuan lebih kurang dua meter peninggi.

Nadai kebuah kitai enda nemuai ngagai Taman Negara Lambir laban iya siti ari palan ti chukup dikerinduka bala temuai. Kelimpah ari ke meda pamanah rampa menua, kitai mega ulih ngerapitka kaul enggau pangan diri lebu ti bisi ngatur pengawa ba palan tu.

(Sumber: [www.miri.sarawak.gov.my](http://www.miri.sarawak.gov.my))

## A K T I V I T I

1. Kelala ayat turu dalam teks lalu tulis dalam bup latih.
2. Nuan bisi perambu deka nemuai ngagai Taman Negara Lambir, bepelasarka kar dalam lambar 117, cheritaka perambu pejalai nuan ari sekula kita ke Taman Negara Lambir.
3. Udah nuan ke macha teks senentang Taman Negara Lambir tu, kati bisi ati nuan deka nemuai kia? Padahka kebuah.

## L A T I H

Tulis lima iti ayat turu ngena jaku penyambung bepelasarka gambar.





## Jalai Jaku

Sida Radin sebilik bisi merambu deka bekem ba Taman Negara Niah. Radin madahka bala kaban iya program sida sebilik ti deka bekem nya.

Radin : Nama program kita maya peremisi tu? Kami sebilik udah merambu deka bekem ba Taman Negara Niah.

Jenaing : Kami sebilik lalu nadai udah merambu pengawa maya peremisi. Kati ti aku enggau kita sebilik bekem, ulih kini?


Lawai : Kami duai Ah Meng deka mih enggau.

Radin : Nadai salah, nya ti manah awakka kitai rami agi.

Ah Meng : Aku bisi perengka dikena kitai bekem. Tambah mega pengajar udah ngajar kitai baka ni chara masang perengka bekem.

Jenaing : Ngasuh ke enda sida apai nih?

Lawai : ...



## AKTIVITI

1. Tampung lalu tulis randau sida Lawai ngena tanda bacha ti betul.
2. Nama kebuah kitai mesti minta pemendar ari apai indai enti deka ngereja aktiviti ba luar?

## LATIH

1. Liska ukur pemanah ti bisi ba randau di atas tu.
2. Ba penemu nuan, nama penguntung bekem? Bantaika ngena kar gelembung.





## Bungai Jaku

Sadaka lagu di baruh tu.

### Selamat Datai Temuai Kitai

Bala temuai mayuh datai  
Ke Sarawak menua kitai  
Bebelika tawak enggau bebendai  
Sereta mayuh bansa pemakai

Taman Negara Bako manah lelendu  
Palan rasung bisi ditemu  
Batang Ai menua Lubuk Antu  
Tekat besai ai chiru

Taman Negara Sebangkoi manah udu  
Agi bedau **madang** engkejuru  
Bukit Aup endur ngulihka penemu  
Bepalan di menua Sibü

Singgah di Batu Niah  
Dipansa orang kundang-kasang  
Jalai mit **bebelit** ditengah  
Nuju Gua Niah ti tebilang

Datai nemuai ke rumah panjai  
Meli selampai enggau tikai  
Belelak ke Pantai Bungai  
Di Bekenu endur **tepanggai**

Taman Negara Lambir dituju  
Ai wung tinggi sereta chiru  
Burung **richah** ragak udu  
Pemeresi menua chukup intu

Nepan bas ke Bandaraya Miri  
Mansa Pantai Tanjung Lobang  
Nepan bilun tetumu pagi  
Gua Mulu tampak **bebendang**





Bala temuai berasai lantang  
Ati rindu naka pengaga  
Udah neresa Bumi Kenyalang  
Ti jelai nama tampak rita.

Tiun Lagu: *Budi Bahasa Budaya Kita*, Dato' Siti Nurhaliza



## AKTIVITI

1. Rintaika taman negara ti bisi di Sarawak kelimpah ari ti bisi dalam lagu.
2. Ba penemu nuan, nama kebuah mayuh temuai datai ke Sarawak?
3. Padahka chara kitai nyaga taman negara awakka utai tumbuh enggau utai idup enda lus.

## LATIH

1. Giga reti leka jaku ti bechura mirah ngena dksionari lalu gaga ayat ngena leka jaku nya.
2. Tulis siti karang pasal Taman Negara di Malaysia ti ditemu nuan.





## Pengukuh

### Seridi

Sambung ayat di baruh tu ngena jaku penyambung ti engkeman.

1.

- Taman Negara Lambir ngembuan 237 bansa barung.
- Taman Negara Lambir ngembuan 1173 bansa pun kayu.

2.

- Pasar India Street tebilang ba Sarawak.
- Pasar India Street ngembuan mayuh macham rempah enggau kain.

3.

- Memarin ulih ngelantangka ati maya lepa.
- Memarin ulih ngerapitka kaul enggau pangan diri.

4.

- Ah Meng bisi perengka dikena bekem.
- Jenaing bisi perengka dikena nginti.

### Pengaya

Tengkebang empat genteran dindang ti betemaka “Sarawak Jelai Nama Tampak Rita”.



Chunto:

*Bungai kenunsung mirah bebendang  
Diengkah endun ba tisi cheremin  
Sarawak digela Bumi Kenyalang  
Tebilang enggau palan memarin.*



 **Tisih**

1. Tulis baru genteran di baruh tu ngena tanda bacha ti betul.

radin nurun nginti enggau jenaing seduai beumpanka buah getah  
benung seduai nginti seduai tekenyit amat meda pemaayah uras dibuai  
orang ke ai apu sapa-sapa ti sangat enda mereti muai uras tu ku  
jenaing tu kereja orang ti nadai tanggung pengawa nyaga pemeresi  
sungai saut radin aram tua muai sekeda ari uras nya ku radin

2. Tulis ayat turu ngena jaku penyambung bepelasarka gambar.



a. ....



b. ....




c. ....



d. ....









3. Gaga lima iti ayat bepelasarka gambar di baruh tu.



4. Gaga karang bepelasarka gambar di atas tu.



5. Beri penambah ti engkeman ngagai urat jaku di baruh tu.

Urat Jaku	Penambah
limpang	
untung	
terang	
tulis	
likun	
datai	

6. Giga entelah di baruh tu.



## Selamat Beserara

Pun tapang reregah bediri  
Anang ditebang taja sebatang dua  
Pengaya menua topik diberi  
Pesaka menua ungkup semua

Betuah belimpah ngasuh temegah  
Topik tiga endur menalan  
Ngereja pengawa manah-manah  
Wi tampung tali rutan tampung danan

Cherita nyadika teladan  
Ngereja pengawa nitihka langgur  
Anang irau anang rawan  
Pengeliat ati mai pemujur

Sama ngaling sama minching  
Nyadika tenggau pengidup kitai  
Topik sedada sama seati  
Ajar ti manah patut dipegai

Bemban batu dianyamka tikai  
Diambi jauh ari menua Lingga  
Asil pengelandik jari bansa kitai  
Nyadika pesaka aris ti berega

Mimit diserepit mayuh ditaruh  
Ngajar kitai bekelimat belanja  
Tali sempekat dipegai teguh  
Ngambika idup kitai menyana

Angin oh angin beresi terebai  
Ngagai utai idup di dunya  
Nuju palan pengumbai temuai  
Tampak rita jelai nama

Deras amat sungai kerangan  
Anak semah selepak batu  
Selamat beserara kitai pangan  
Betemu baru ba Pom Satu.



Dengan ini **SAYA BERJANJI** akan menjaga buku ini dengan baik dan bertanggungjawab atas kehilangannya serta mengembalikannya kepada pihak sekolah pada tarikh yang ditetapkan.

### Skim Pinjaman Buku Teks

Sekolah \_\_\_\_\_

Tahun	Darjah	Nama Murid yang Menerima	Tarikh Terima

Nombor Perolehan: \_\_\_\_\_

Tarikh Penerimaan: \_\_\_\_\_

**BUKU INI TIDAK BOLEH DIJUAL**